

Месяца ноемвриа в 27-й день
Собор новомучеников и исповедников Радонежских
На велицей вечерни
На Господи, воззвах: стихиры, глас 6.

Подобен: Все отложше:

Все отложивше мирское пристрастие,/ преподобномученицы и исповедницы Радонежстии,/ Христа всем сердцем возлюбили есте/ и, взявше крест свой,/ Тому последовали есте невозвратным помыслом./ Сего ради, благодать восприемше,/ изгнания и узы темничныя,/ бедствия, лишения, глад и хлад,/ и мучения телесная претерпели есте/ и веру Православную сохранили есте./ Ныне же, с преподобным Сергием/ во славе Богу предстояще,/ молитесь спастися душам нашим.

Все мирское мудрование отринувше,/ новомученицы и исповедницы Радонежстии,/ во ограде дома Святыя Троицы учившии и учившиися,/ Христа Премудрость Божию возлюбили есте,/ мудрость бо Небесная/ чиста, мирна, кротка, благопокорлива,/ нелицемерна и несумненна,/ еюже исполнившесе,/ Христа небоязненно проповедали есте/ и венец страдания восприяли есте./ Ныне же, с преподобным Сергием/ во славе Богу предстояще,/ молитесь спастися душам нашим.

Все упование на Бога возложивше,/ святии священномученицы Радонежстии,/ пастырие достоблаженнии,/ яко истиннии служителие Бога живаго,/ во время разорения Троицкия лавры/ во окрестных храмах жертву безкровную приносили есте,/ паству без попечения не оставляюще,/ о беззаконных же молилися есте:/ Господи, прости им,/ не ведят бо что творят./ Ныне же, с преподобным Сергием/ во славе Богу предстояще,/ молитесь спастися душам нашим.

Всею душею Бога возлюбивше,/ святии новомученицы и исповедницы Радонежстии,/ посреде мирскаго мятежа/ во всяцем роде и звании/ во благочестии пожили есте./ Во дни же гонений лютых,/ покрова и заступления преподобнаго Сергия взыскующе,/ града его не оставили есте/ и, добре Церкви Православней послуживше,/ яко истиннии мученицы и исповедницы пострадали есте./ Ныне же, со святым аввою/ во славе Богу предстояще,/ молитесь спастися душам нашим.

Слава, глас тойже:

От юности постническому житию навек,/ отче преподобне Крониде,/ во обитель Святыя Троицы вселился еси/ и истинный ученик преподобнаго Сергия явился еси./ Тесным путем иноческим последуя,/ удобь возшел еси во обитель Небесную,/ идеже воздаяние трудов твоих/ и венец неувядаемый приял еси./ Темже молися вкупе с преподобным Сергием,/ еже святей лавре утвержденней быти/ и душам нашим спастися.

И ныне, Знамения, глас тойже: Веселитесь, людие:

Вход. Прокимен дне. И чтения мученическая.

На литии стихира храма.

Слава, святых, глас 5:

Приидите, людие,/ новомучеников и исповедников Радонежских
песньми и пении восхвалим,/ честную память их совершающе и
глаголюще:/ радуйтесь, отечества нашего преславнии
светильницы,/ радуйтесь, яко кровь свою за Христа пролияли
есте,/ радуйтесь, яко узким путем на Небо возшли есте,/ радуйтесь,
яко с преподобным Сергием предстоите Пресвятей
Троице,/ Юже непрестанно молитесь/ даровати душам нашим мир
и велию милость.

И ныне, Знамения, глас 6: Се день избавления нашего наста:

На стиховне стихиры, глас 2.

Подобен: ДOME Евфрафов:

Святии сродницы наши,/ Небеснии предстателие,/ теплии
молитвенницы,/ чада Сергия преподобнаго,/ молитесь о нас ко
Господу.

Стих: Возваша праведнии,/ и Господь услыша их.

Горо избранная,/ Маковец издревле именуемая,/ собором
мученик светло украшенная,/ достойно веселися и радуйся/ в сей
день преславнаго торжества.

Стих: Честна пред Господем/ смерть преподобных Его.

Преподобномучениче Крониде,/ верный преемниче аввы Сергия,/ начальниче
лика новомученик,/ в земли Радонежстей подвизавшихся,/ с ними молися о нас ко Господу.

Слава, глас тойже:

Теплии наши заступницы,/ Радонежстии мученицы и
исповедницы,/ Православныя веры поборницы/ и Святыя Троицы
вернии служителие,/ молитесь, о еже спастися нам.

И ныне, Знамения, глас 8: Мнящеся непокоривии:

Тропарь, глас 5:

Новомученицы и исповедницы земли Радонежския,/ верная чада
Сергия преподобнаго,/ вы, гонений лютых не убоявшеся,/ веры
ради добре подвизастесь/ и страдания Христа ради претерпесте./
Темже ныне в Небесных чертозех пребываете/ и прославляете
Троицу Живоначальную,/ Юже молитесь спастися душам нашим.

На утрени

По 1-м стихословии седален, глас 2:

Велия веры исправления,/ во изгнании и горьких работах
новомученицы и исповедницы Радонежстии,/ яко в раи сладости,
любве Божия приобщахуся,/ им же преподобный Сергий крепкий
защитник являхуся./ Тех молитвами, Христе Боже, спаси души
наша.

Слава, и ныне, Знамения: Очи мысленныя очистивше:

По 2-м стихословии седален, глас 8:

Яко мученики и исповедники истинныя,/ восхвалим, вернии,
добрыя пастыри стада Христова/ вкупе с братиею обители Святыя
Троицы и учителя любомудрия духовнаго и тако им возопиим:/
радуйтесь, прелесть безбожия доблественне обличивши,/ радуйтесь,
за Христа страдания претерпевши,/ Ему же молитесь,

согрешений оставление даровати,/ празднующим любовию
святую память вашу.

Слава, и ныне, Знамения: Пречистая Твоя икона, Богородице
Дево:

Величание:

Величаем вас,/ святии новомученицы и исповедницы
Радонежстии,/ и чтим честная страдания ваша,/ яже за Христа/
претерпели есте.

Псалом избранный: Бог нам Прибежище и Сила:

По полиелеи седален, глас 1:

Явися стране нашей новомучеников и исповедников Радонежских
память,/ света истинно исполнена и зарею благодати облистаема./
Христос бо, Солнце светлое, свыше просияв от Востока,/ собор
истинных Своих свидетелей в мучениих укрепи,/ воплощение Его
исповедавший и страданьми засвидетельствовавший./ Все убо,
верою рождество Христово благочестно чтуще,/ воспеваем хвалу
предпразднственную.

Слава, и ныне, Знамения: Яже Небес превышши сущи:

Прокимен, глас 4: Проидохом сквозе огонь и воду,/ и извел еси ны
в покой. Стих: Разжегл ны еси, якоже разжизается сребро.

Евангелие от Матфея, зачало 36 (10, 16-22).

По 50-м псалме стихира, глас 6:

Приидите, вернии,/ новомученики и исповедники Радонежския
почтим,/ тии бо во дни гонений безбожных/ образ благочестиваго
жития показаша,/ правило веры исповедаша/ и страдания за
Христа мужественне восприяша./ Ныне же во Царствии
Небеснем,/ с преподобным Сергием Богу предстояще,/ прилежно
молятся спастися душам нашим.

Канон, глас 8.

Песнь 1

Ирмос: Колесницегонителя фараоня погрузи,/ чудотворяя
иногда/ Моисейский жезл, крестообразно поразив/ и разделив
море,/ Израиля же беглеца, пешеходца спасе,/ песнь Богови
воспевающа.

Припев: Пресвятая Троице, Боже наш, слава Тебе.

Благословен еси, Христе Боже наш,/ Иже новомученики
Радонежския в нашей Церкви явлей,/ низпослав им в страданиях
Духа Святаго/ и теми прославлей Отца Небеснаго,/
Человеколюбче, слава Тебе.

Припев: Пресвятая Троице, Боже наш, слава Тебе.

Господи, Боже наш, присно прославляющий святых Твоя,/ ныне и
нас, недостойных,/ сподоби прославить святых предстателей
наших,/ новомучеников и исповедников Радонежских.

Припев: Святии новомученицы и исповедницы Радонежстии,/
молите Бога о нас.

Днесь земля Радонежская торжествует,/ прославляюще, яко чада,
новомученики и исповедники своя,/ ихже страдания и подвиги
имя Святых Троицы достождно прославляется.

Богородичен: Якоже живу Матерь Слова видевшие Тя
сумудренных многочисленное воинство,/ якоже бодренного
блостителя, на забралех обстоиму верными,/ абие руке их с
прочими уды ослабеша.

Песнь 3

Ирмос: Утверждей в начале Небеса разумом/ и землю на водах
основавый,/ на камени мя, Христе, заповедей Твоих утверди,/ яко
несть свят, паче Тебе, Едине Человеколюбче.

Принесем, вернии, похвалу преподобномученику Кронида,/ иже,
яко добрый кормчий, братию обители Сергиевы мудре управил
есть/ и страданьми за Христа житие свое увенчал есть.

От Божия Матере в юности наученный пощением чтити
страдания Сына Ея,/ на камени заповедей Господних житие твое
утвердил еси, преподобномучениче Крониде,/ и даже до смерти
мученически пострадал еси.

Аще и изгнан бысть безбожники из обители,/ обаче крест
игуменства не оставил еси, преподобномучениче Крониде./
Темже, братию гонимую утешая и наставляя,/ любовь Христову
пред мучители исповедал еси.

Богородичен: Ныне наста день веселия –/ Знамения иконы Твоея,
Дево Богородительнице,/ и праздник светел, егоже совершающе,
вопием:/ несть Пречистыя, паче Тебе, Богоневесто.

Седален, глас 1:

Учения безбожного не приемше,/ но верую истинною
защитившися, новомученицы Радонежстии,/ в подвизе
исповедания прославились,/ посреде же страданий нестерпимых
пребывающе, Бога призываєте:/ ускори, о Щедрый, и потщися,
яко милостив, в помощь нашу,/ яко можеша, хотяй.

Слава, и ныне, Знамения: Яже древле пророки проповедаша:

Песнь 4

Ирмос: Ты моя Крепость, Господи,/ Ты моя и Сила,/ Ты мой Бог,
Ты мое Радование,/ не оставль недра Отца/ и нашу нищету
посетив./ Тем с пророком Аввакумом зову Ти:/ силе Твоей слава,
Човеколюбче.

Древних мученик стопам последующе,/ во дни гонений
подвизастесь твердо,/ святии преподобномученицы обители
Троицкия./ Ныне же, ликующе во Царствии Божии,/ Христу,
укреплъшему вы, подвизаете нас взывати:/ силе Твоей слава,
Човеколюбче.

Лик преподобномучеников Радонежских ублажающе,/ прославим
Троицу Живоначальную,/ Еяже обитель ныне светло красуется,/ и
с любовью Богу возопиим:/ силе Твоей слава, Человеколюбче.

Хвалу Единосущней Троице ныне приносяще, молим вас,
преподобномученицы:/ помозите нам дух братолюбия, терпения и
смирения стяжати,/ единомыслие хранити и с чистым сердцем
взывати:/ силе Твоей слава, Человеколюбче.

Богородичен: Собори верных и всяко состояние человеческое
веселится,/ совокупльшися в честном храме Твоем,/ зряще в нем,

якоже пресветлое солнце, честный образ Твой, Владычице.

Песнь 5

Ирмос: Вскую мя отринул еси/ от лица Твоего, Свете
Незаходимый,/ и покрыла мя есть чуждая тьма, окаяннаго,/ но
обрати мя и к свету заповедей Твоих/ пути моя направи, молюся.
Истинней мудрости словом учаще своя ученики, новомученицы и
исповедницы Радонежстии,/ учениками аввы Сергия делом себе
явили есте,/ страданьми проповедующе Христа, Божию Силу и
Премудрость.

Яко истиннии учителяе, новомученицы Радонежстии,/ вере и
благочестию ученики научили есте/ и с верою несумненною
Христу последовали есте,/ смиривше себе даже до смерти.

Свыше назирающе, мученицы славнии,/ с любовию
ходатайствуйте о нас, память вашу совершающих,/ и небесныя
мудрости испросите нам у Дароподателя Всевышняго.

Богородичен: Тя богатство неистошимое имуще и исцелений
источник/ верою прибегающи храму Твоему,/ идеже пребывает
честный образ Твой, Владычице.

Песнь 6

Ирмос: Очисти мя, Спасе,/ многа бо беззакония моя,/ и из
глубины зол возведи, молюся,/ к Тебе бо возопих, и услыши мя,/ Боже спасения моего.

О возстановлении чина патриаршаго в Церкви Русстей ревнуя,
священномучениче Иларионе,/ Патриарху исповеднику во всем
споспешник был еси/ и лжепоновителей чина церковнаго
обличил еси,/ темже и Христа со дерзновением исповедал еси, во
узах Того прославляя.

Любомудрию отцев синайских поучаяся,/ подвигом добрым
подвизался еси, священномучениче Иоанне,/ разум же истине
Христовой покорив,/ пастве образ чистоты и благочестия явил
еси/ и кровию мученическую житие твое запечатлел еси.

Велие попечение о вере и благочестии присно имея, мучениче
Иоанне,/ потщался еси во дни разорения Лавры мощи
преподобнаго Сергия от поругания сохранить./ Сего ради ныне с
ним во Царствии Божии ликуеши.

Богородичен: Честную икону Твою радостным сердцем и душою
облобызаим, веселящися,/ и, теплою верою прикасающися,
исцеляем почерпаем.

Кондак, глас 3:

Яко цветы краснии и благоуханныи,/ святии новомученицы и
исповедницы,/ землю Радонежскую украсили есте,/ юже Сергий
преподобный житием прослави./ С ним же молитесь ко Господу,/ еже
во истинней вере нам ходити/ и спастися душам нашим.

Икос:

Сущая в мире возненавидев,/ премирная и нетленная селения,
отцы богомудрии, стяжали есте,/ и венцем почести, яко
победители, увенчались есте,/ молитвами вашими всех
покрывающе, восхваляющих вас сице:/ радуйтесь,

преподобномученицы,/ яко Христа всем сердцем возлюбивше,/ Тому невозвратным помыслом даже до смерти последовали есте;/ радуйтесь, наставницы вертограда духовнаго,/ яко Христа, Премудрость Божию, истинно и небоязненно проповедали есте;/ радуйтесь, священномученицы,/ яко во дни разорения обители Троицкия/ во окрестных храмах жертву безкровную приносили есте;/ радуйтесь, святии,/ яко во всяцем роде и звании добре Церкви Православней послужили есте;/ радуйтесь, новомученицы и исповедницы Радонежстии,/ яко ныне с преподобным Сергием во славе Богу предстояще,/ молитесь спастися душам нашим.

Песнь 7

Ирмос: Божия снисхождения/ огонь устыдися в Вавилоне иногда./ Сего ради отроцы в печи, радованною ногою,/ яко во цветнице, ликующе, пояху:/ благословен еси, Боже отец наших.

Пастырь добрый и служитель верный явился еси, преподобномучениче Маврикие,/ темже, от богоборцев до смерти пострадав,/ мученический венец с Василием славным от Христа восприял еси./ С нимже, предстоя Престолу Господню, поминай нас, чтущих святую память твою.

Во обители Троицстей преподобномученику Крониду сыновне послужил еси, святе Ксенофонте,/ таже, многая испытания и темничная заключения претерпев,/ вкупе с ним пострадади за Христа сподобился еси./ Ныне же во обителях Небесных радостно ликуете.

Яко злато в горниле искушен быв, священнодиаcone Феофане,/ богоборцев нечестивых не убоялся еси,/ и, яко воин непобедимъ, явлься,/ венец славы от Бога приял еси./ Емуже, во славе Небесней ныне предстоя, молися о душах наших.

Богородичен: Светоносная благодать и исцеления дарование/ дадеся граду Твоему образ Твой, Пречистая,/ егоже любезно обლობызающе, веселимся.

Песнь 8

Ирмос: Седмерицею пещь/ халдейский мучитель/ богочестивым неистовно разжже,/ силою же лучшею спасены сия видеи,/ Творцу и Избавителю вопияше:/ отроцы, благословите,/ священницы, воспойте,/ людие, превозносите во вся веки.

Мнози благочестивии, именитии и простиин,/ чающе утешения и укрепления во дни гонений,/ под покров преподобнаго Сергия собращася/ и удостоишася с братией пострадади, яко вернии ученицы его.

Ревностию и любовию Божиею распалаеми,/ благочестивии людие во дни разорения Лавры святыни ея сохраниша/ и честную главу аввы Сергия от поругания сокрыша,/ темже и пострадади сподобишася, яко вернии ученицы его.

Добродетель евангельскаго милосердия являющи,/ в заточении страждущим усердно послужила еси,/ мученица Татиано преславная./ Послежде и сама, аще и естеством жена сущи,/ мужески пострадади сподобилася еси, яко верная ученица

Сергиева.

Богородичен: Что Ти принести, Пречистая,/ от всея твари славимей, недоумеемся, Владычице,/ точию еже Гавриил нас научи:/ радуйся, Обрадованная.

Песнь 9

Ирмос: Ужасеся о сем Небо/ и земли удивишася концы,/ яко Бог явися человеком плотски/ и чрево Твое бысть пространнейшее Небес./ Тем Тя, Богородицу,/ Ангелов и человек чиновачалия величают.

Светися, светися, гора Маковец,/ слава бо Господня на тебе возсия./ Ликуй ныне и веселися обитель Сергиева,/ днесь бо лик новомучеников твоих хвалу Троице Живоначальней возносит. Ни скорбь, ни теснота, ни гонение,/ ни горькия работы, ни узы, ни самая смерть/ возмогоша разлучити вас, новомученицы Радонежстии, от любве Божия,/ молитвами же аввы Сергия вся терпяще,/ благодарение Богу присно возносили есте.

Троичен: О, Троице Честная,/ прими, яже земля Радонежская приносит Ти,/ яко начатки и яко фимиам избранный,/ вся Богу угодившыя и прежде, и послеще в ней,/ и знаемыя, и незнаемыя,/ и молитвами их от всякаго вреда нас сохраняй.

Богородичен: Девства Твоего знамения невредиво сохранив, Слово Божие, из Тебе прошед,/ сохрани град Твой невредив, Дево Всепетая,/ да Тя непрестанно величаем.

Светилен:

Иже во свете живый неприступнем и содержай всяческая,/ за благоутробие неизреченное от Девы раждается/ и пеленами повивается, яко Младенец./ Волхвы грядут в Вифлеем на поклонение Ему,/ с нимиже и собор новомучеников Радонежских поспешает,/ страдания и исповедания своя приносяще воплощемуся Богу, якоже дары.

Слава, и ныне, Знамения: Возжелев Твоя доброты Иисус: На хвалитех стихиры новомучеником, глас 8.

Подобен: О, преславнаго чудесе:

О, преславнаго чудесе!/ Царя Небеснаго избранная дружино,/ святии новомученицы Радонежстии,/ на камени веры житие свое утвердили есте/ и, лютая гонения нивчтоже вменивше,/ кровь свою за Христа пролияли есте./ Ныне же, в Небесных обителях пребывающе/ и райскаго блаженства наслаждающиеся,/ молятся о душах наших.

О, преславнаго чудесе!/ Достойнии ученицы Христа Архипастыря,/ святии новомученицы Радонежстии,/ ничтоже вас разлучи от любве Божия,/ темже и паству Христову возлюбили есте/ и Жертву Безкровную о всех и за вся приносили есте./ Ныне же истее Сея причащаетесь/ в невечернем дни Царствия Божия/ и молитесь о душах наших.

О, преславнаго чудесе!/ Делателие вертограда духовнаго,/ святии новомученицы Радонежстии,/ юныя сердца и умы просвещающе,/ учение Христово насаждаете/ и образ терпения покажете./ Ныне

же в вертограде Небеснем/ райския пищи наслаждаетесь/ и молитесь о душах наших.

О, преславнаго чудесе!/ Верная чада Божия,/ святии новомученицы Радонежстии,/ лишения, изгнания и мучения претерпевше,/ твердостью веры мучители посрамите/ и силою Христовою силу вражию препобедите./ Ныне же Престолу Божию во славе предстоите,/ мученическими венцы украшении,/ и молитесь о душах наших.

Слава, глас тойже:

Приидите, празднолюбцы,/ святые новомученики Радонежския духовне почтим,/ тии бо во дни гонений лютых/ во мраце нечестия и безбожия,/ яко звезды, возсияша/ и веру Православную утвердиша./ Ихже подвиги обитель Святыя Троицы красуется,/ духовный вертоград плодоносит/ и храмы окрестнии утверждаются./ Сего ради благодарне Христу Богу возопиим:/ Ты еси мучеников похвала и победа, Всесильне.

И ныне, Знамения, глас тойже: Мнящиеся непокоривии:

На Литургии

Блаженны от канона песни 3-я и 6-я. Прокимен, глас 7: Бог нам Прибежище и Сила. Стих: Помощник в скорбех, обретших ны зело. Апостол к Римляном, зачало 99 (гл. 8, 31-39). Евангелие от Луки зачало 105-106. Конец: В терпении вашем стяжите души ваша: (гл. 21, 8-19). Причастен: Радуйтесь, праведнии, о Господе: Молитва

О, святии новомученицы и исповедницы земли Радонежския, за Христа пострадавший, верность Ему даже до смерти свидетельствовавший и венец жизни от Него приемший! Вы во дни гонения лютаго, землю нашу от безбожных постигшаго, на судищах, в заточениях и пропасть земных, в горьких работах и всяких скорбных обстояниях образ терпения и непостыднаго упования мужественно явили есте. Ныне же пред Престолом Божиим во славе предстоите и присно хвалу с преподобным Сергием и всеми святыми Троице единому Богу возносите. Сего ради мы, недостойнии, молим вас, святии сродницы наши: молитвами вашими сохраните обитель сию, яко Дом Живоначальныя Троицы; наставите нас на путь жизни вечныя; укрепите в вере и единомыслии; согрейте сердца наша духом евангельския любви и братолюбия; помозите подвигом добрым подвизатися противу козней диавольских и всякаго греха; умолите Господа Сил, да, простив нам согрешения наша, помилует по велицей Своей милости и сподобит вкупе с вами прославляти Его в Небеснем Царствии, яко Милостиваго и Человеколюбиваго Бога нашего Отца и Сына и Святаго Духа ныне и присно и во веки веков. Аминь.